

La Risola 2018 anter sport, teater e riflessions

L'é vegnù fora chisc dis i trei projec porté tel pian joegn de Fascia dai joegn fascegn che vel spartir con si compagne de val neva esperienzes

Joegn - Dò aer ciapà l benstèr di ofizies provinzièl, l'è a la leta da pec dis i projec del Pian Joegn de Fascia La Risola vidà da la referenta tecnica Susanna Gandini.

I projec, desche vigni an i è stac pissé dai joegn e i è fac per i joegn. Chest an i è en dut trei: "6 sportivo!?", "Ragazzi in scena. Laboratorie de teater" e "TEAnTER".

Persones, teater e sensibilizazion". Per vigni informazion se pel vijiter la piata Facebook de La Risola, telefonèr a Susanna 347.6668006 o manèr na email a pianogiovani.larisola.fassa@gmail.com.

"6 sportivo!?"

L projet leà al sport l'è stat portà dant a La Risola dal Consei di Joegn de Fascia aldò de na enrescida fata l'an passà te la scoles de Fascia. Da l'elaborazion di dac del chestionèr del Consei, l'era vegnù fora ence che n muie de fascegn sportives e tel setor agonistich, canche i rua a la mesèna o la scola autes, i mola: no i fèsc più gares e no i pratega più sport. Chest percheche l stress per ie l doventa massa gran.

Con l'obietif de viventèr ti joegn la pascion per l sport, l Consei di Joegn de Fascia l se à pissà de portèr dant n projet che ge fae proèr a si compagne sport desvalives e de l fèr duc ensema te n spirit de amicizia e nia competitiv. Vegnarà fat proèr 6 desvalives sport: de firé l telemark,

de oril l rugby, de mè l'orienteeing, de jugn la rampinèda, de setember l baseball e de november le "arti marziali".

La enscinuazions les é avertes fin a canche no se rua a 20 partezipanc. L cost l'è 30 euro per 24 scontrèdes e pel se scriver ite joegn dai 15 ai 19 egn. Se oujer a Gabriele: telefon 392.4255895, email conseidijoegn@gmail.com.

"Ragazzi in scena"

Se trata de n laboratorie de teater

pissà per i joegn dai 11 ai 14 egn de duta Fascia e l vegnarà fat dai 2 de mèrz a la fin de oril ló dal Zenter Polifunzionèl del Comun de Mazin (a Palua a Ciampestrin). L spetacol finèl l vegnarà fat te Teater Marmolèda de Cianacei e se cogn se scriver ite dant dai 23 de firé.

L projet l'è stat portà dant da l'atora profescionista Michela Marangoni de la Sociazion Culturèla Antermoa e dal Comun de Mazin con l'obietif de ge fèr proèr na esperienza de teater ai joegn de noscia val. Endèna la scontrèdes ge

vegnarà dat gran lèrga a la fantasia e la creatività di bec e la bezes che tolarà pèrt. A ogni partezipant ge vegn domanà n contribut de 50 euro.

Per n saer de più se pel contatèr Michela: telefon 348.0043352, email associazioneantermoia@gmail.com.

"TEAnTER"

Chest projet l'è stat portà dant da la neva sociazion de joegn fascegn InOut e l perveit 5 scontrèdes de formazion, 2 dis de full immersion e 1 spetacol finèl.

I joegn de InOut defat i se à pissà de chiamèr ite si compagne (dai 13 ai 20 egn) e ensema a ic meter a jir n spetacol de teater sui temes che vegnarà fora endèna la ores de aprofondiment olache se empararà ence a rejonèr delvers, a spilenèr e co se comportèr sun paladina. "TEAnTER" vel esser n viac per cognoscer neva emozions e neva persones, anter pascions, debolezes e dependenzes. Se arà l met de se cognoscer artisè e testamonesc de esperienzes che darà ricchezza a la vita e al cher de vigni persona.

L cors vegn fat da la metà de mèrz a la fin de oril te oratorie de Poza, ge vel se scriver ite dant di 9 de mèrz. L contribut domanà l'è 30 euro.

Info: Martin Pederiva 331.8424531, Thomas Zulian 349.6491192, mail inoutfassa@gmail.com. (vr)



I joegn del Consei en vijita a la Region a Trent en ocajon del cors de politica endrezà i egn passé.



L simbol de La Risola.